

119-120

百五十九



續文獻通考卷之一百十九

皇明進士雲間王圻纂輯

王禮考 朝儀一

皇明

太祖洪武元年令正旦冬至及壽旦各衙門不許於寺觀行香其萬歲牌不許復設五年九月聖誕前一日中書右丞相汪廣洋請行賀禮上曰朕已令罷此禮卿等其體朕懷時高麗國遣陪臣進表稱賀并太子千秋節上詔中書悉諭免之十三年九

月 上以古人父母既沒生日當倍悲痛即位以來常
不受賀至是李善長等累請乃許之其在外諸司五品
以上者自明年始聽其表賀 二十年九月乙未 天
壽聖節受朝賀宴羣臣於 奉天殿 皇太子宴國戚
暨 東宮官於 文華殿 二十二年 上御奉天殿
受朝賀大宴羣臣於 文華殿 皇太子宴 東宮官
屬于 文華殿高麗遣使貢方物進賀 又令凡遇大
朝賀除已習儀及具服官員許入班其餘便服人員止
於 午門外行禮執事官于 華蓋殿行禮披甲帶刀

侍衛之人免拜五府六部等官于 殿內侍立今皆入

班奏事止于 華蓋殿 二十四年令禮官置百官朝

班序牌大書品級列丹墀左右木柵之上文武百官照

品序立侍班 二十六年定 萬壽聖節百官朝賀儀

正旦冬 致詞云恭惟 皇帝陛下萬壽令節 臣某 等誠

懼誠忭敬祝 萬歲壽 至三十年改令節為 聖節

後嘉靖年定儀亦與正旦冬至同但鴻臚加設玉帛案

二于殿內簾前致詞亦同朝班序立

成祖永樂六年令 帝王生日先于 宗廟具禮致祭然

後序家人禮百官慶賀禮畢筵宴

宣宗宣德六年二月 萬壽聖節 上御製詩一章賜尚書蹇義胡濙大學士楊士奇楊榮且曰朕茂膺天眷惟爾四人贊翊之功 賜宴盡歡而罷詩曰九天日月絢祥光 萬歲慈幃樂壽康初度幸逢全盛日贊襄有道賴賢良

景皇帝景泰元年十一月 上皇萬壽聖節禮部尚書胡濙等請羣臣朝 詔免

世宗嘉靖七年奏准凡遇 萬壽聖節正旦冬至大朝賀

先令 承天門 端門及 左右闕門守門內外官員嚴禁雜人行走鼓初嚴 執事官并侍衛官軍先入次

皇親公侯駙馬伯次在京文武品官次來朝品官次內外雜職次生儒次外國四夷人至 奉天殿下文武百官依品級序立毋得攙越亂班禮畢外國四夷先出次生儒次雜職次文武品官次侍衛官軍及儀從人等俱盡象馬方行其金水橋東西角門各添設序班凡有攙越者御史序班糾舉拏奏若有市井姦人假借儒吏衣巾冒入殿庭錦衣衛官校緝拏 又令凡正旦冬至

聖節百官俱于先期之三日及二日習儀正旦冬至于朝天宮 聖節于靈濟宮 九年更定 郊祀冬至習儀先期于七日及六日 二十一年令 聖節正旦冬至俱赴朝天宮習儀 凡正旦節自十二月二十八日起至正月二十日止百官俱吉服通政司不奏事冬至前三日後三日 聖節前三日後三日俱吉服通政司亦不奏事 凡朝賀班首致詞官例用勳臣有缺則禮部題請 欽定 凡進賀表目 親王各一通各處掛印總兵官各一通朝鮮國王一通南京禮部等衙門

一通浙江等布政司按察司直隸府州等衙門各一通南京中軍等都督府一通中都留守司浙江等都司直隸衛所等衙門各一通凡大朝賀先期禮部移文各衙門取具執事等官職名并陳設儀衛等項數目榜揭習儀處所以便供事 十六年更定 前一日尚寶司設寶案于 奉天殿 寶座之東鴻臚寺設表案二于殿東中門外禮部主客司設蕃國貢方物案八于 丹陛中道左右欽天監設定時鼓于文樓之上教坊司設中和韶樂于 奉天殿內東西設大樂于 奉天門內

東西俱北向至期錦衣衛陳鹵簿儀仗于 丹陛及
丹墀東西設羽扇于 殿內東西陳車輅出輦于 奉
天門丹墀中道北向金吾等衛列甲士軍仗于 午門
外 奉天門外及 丹墀東西旗手衛設金鼓于 午
門外列旗幟于 奉天門外 御馬監設仗馬錦衣衛
設馴象于文武樓南東西相向欽天監設報時位于
丹陛之東鼓初嚴百官具朝服齊班于 午門外鼓次
嚴引班官引百官并進表人員及四夷人等次第由
左右掖門入詣 丹墀序立欽天監鷄唱官司晨一員

于文樓下西向錦衣衛將軍六員于 殿內之南北向
將軍四員于 丹陛四隅東西相向其餘侍衛將軍各
分立于 殿陛等處如儀鳴鞭四人于 丹墀中道左
右北向金吾等衛護衛官二十四員于 丹陛之南六
員于 丹墀之北俱東西相向陳設方物鴻臚寺司賓
署丞一員徹方物案鴻臚寺序班十六員于 丹陛中
道左右外贊鴻臚寺鳴贊等官十二員于 丹陛及
丹墀東西糾儀御史十二員于 丹墀之東西 殿前
侍班錦衣衛千戶六員光祿寺署官四員序班二員傳

呼鳴鞭錦衣衛百戶四員俱于殿中門外東西相向
導表六科都給事二員序班二員于表案左右掌領侍
衛官三員于殿內東西相向錦衣衛正直指揮一員
于簾右東向百戶二員于簾下左右相向捲簾畢即趨
出殿門外各豫立以俟鼓三嚴執事禮部堂上官并
內贊鳴贊一員陳設表案并舉案序班五員典儀鴻臚
寺司儀署丞一員捧表禮部儀制司官四員展表六部
都察院通政司大理寺堂上官二員宣表致詞并傳
制等項鴻臚寺堂上官五員捧寶尚寶司官二員導

駕六科給事中十員殿內侍班翰林院官四員中
書官四員糾儀御史四員序班二員及各遣祭官俱詣
華蓋殿外候上具衮冕陞座鐘聲止入序立遣
祭官以次復命訖各趨入丹墀班禮部堂上官跪
奏方物并請上位看馬候得旨復位鴻臚寺卿跪
奏執事官行禮贊拜叩頭畢贊各供事鴻臚寺卿跪請
陞殿駕興導駕官前導尚寶司官捧寶前行中
和樂作奏聖安之曲上御奉天殿陞座導
駕官立于殿內柱下東西相向侍班翰林院立于東

導 駕官之後中書官立于西導 駕官之後糾儀御
史序班分立于侍班官之下尚寶官置 寶于案分立
于導 駕官之上樂止鳴鞭報時鷄唱訖外贊唱排班
班齊鞠躬大樂作四拜興平身樂止內贊贊進表大樂
作導表官導表案至 殿東中門止序班舉案入置
殿中退立于東西柱下樂止贊宣表目禮部堂上官并
宣表目官詣 殿中跪宣畢各叩頭退贊宣表展表官
取表同宣表官詣 殿中跪外贊贊跪衆官皆跪宣畢
展表官分東西先退外皆贊俯伏大樂作興平身身樂

止宣表官退序班舉案置 殿東外贊贊跪衆官皆跪
代致詞官跪于 丹陛中道致詞云公侯駙馬伯文武
百官具官臣某等詞與洪武間所定同賀訖外贊贊俯
伏衆官皆俯伏大樂作四拜興平身樂止傳 制官詣
御前跪奏傳 制俯伏興由東門靠東出至 丹陛
之東西向立稱有 制外贊贊跪衆官皆跪宣 制
洪武間所定同宣訖外贊贊俯伏大樂作興平身樂止贊播笏

鞠躬三舞蹈贊跪唱山呼百官拱手加額曰萬歲唱山
呼曰萬歲唱再山呼曰萬萬歲贊出笏俯伏大樂作四

拜興平身樂止鴻臚卿詣 御前跪奏禮畢鳴鞭中和

樂作奏定安之曲 駕興尚寶官捧 寶導 駕官前

導至 華蓋殿樂止引班官引百官人等以次出序班

徹方物案所司設黃幄于 丹陛上陳 王府及勳臣

總兵官外夷所進馬匹于 丹墀內禮部并鴻臚寺官

立于 丹墀東候 上易便服 御黃幄甲士行禮畢

禮部官詣 御道中跪奏 御馬過奏畢復位候馬過

詣 御道中跪奏馬過畢 駕還宮 嘉靖四十一年更

極殿門曰皇極門 華蓋殿 曰中極殿後具儀俱用新名 三十二年安慶府推官

郭來朝當給由并捧 聖壽表入京會吏部選郎楊載

鳴以行取疏上來朝間報即棄表歸巡按劾其不敬及

任內貪暴狀 上謂選郎欺蔽并謫典史 四十三年

秋八月初十日 聖誕節 上遣成國公朱希忠于

玄極殿行拜 天禮訖 上賜以銀五十兩彩段二表

裏

初制冬至日即行賀禮今分祀 二郊以冬至大報是

日行慶成禮次日行冬至朝賀禮畢 舉慶成宴本年

再定次日 上詣內殿行節禮禮又詣 母后前賀禮

畢始 御奉天殿受百官賀

冬至大祀慶成儀

世宗嘉靖七年定 上大祀禮成 駕還百官具朝服于承天門外橋南立迎 駕隨至 奉天殿丹墀內侍立執事官先至 華蓋殿前東西拱立候 上御華蓋殿具袞冕服 陞座鴻臚寺堂上官跪奏執事官行禮鳴贊贊入班鞠躬五拜三叩頭興平身各供事鴻臚寺堂上官跪奏請陞 殿教坊司樂作 上御奉天殿陞座樂止錦衣衛官傳鳴鞭鴻臚寺堂上官傳排班鳴

贊贊排班班齊鞠躬四拜興平身贊跪鴻臚寺堂上官于丹陛中道跪致詞曰公侯駙馬伯文武百官具官臣某等恭惟圜丘大報載成禮當慶賀致詞畢由殿東門入 殿內侍立鳴贊贊俯伏興鞠躬樂作四拜興平身樂止鴻臚寺堂上官于 殿內跪奏禮畢傳贊禮畢錦衣衛官傳鳴鞭 上還宮百官退

穆宗隆慶二年題准 丹墀糾儀序班添二員

今上萬曆七年 諭衍聖公以 萬壽入賀 朝廷待以賓禮不在文武職官之列不必朝參

按鄭曉吾學編載 世宗朝每 萬壽聖節先一日

上以酒果告 祖宗列聖帝后于 奉先殿至日以酒

脯告 皇天上帝于 玄極寶殿遣官以牲醴祭 神

烈山 天壽山純德山諸陵墳及東嶽都城隍以素

羞祭玄帝及靈濟宮又以素羞告修齋于道極七寶帝

尊 皆稱名云 嗣天子若遇正旦 皇帝拜 天子

玄極寶殿用酒脯果帛凡正旦先一日 帝由午門

右順思善精一會極順德咸和右通玄凌霄集真門入

殿演禮出長庚門宿闕右支持房子由右掖右順思

善長庚二南四德步虛集真門入 殿供事此皆 嘉

靖中修玄事也正旦者朔之始也冬至者氣之始也兩

朝賀俱大禮視 先朝少異

朝儀事例

太祖洪武九年八月御史大夫汪廣洋陳寧劾奏李善長

李祺父子孤恩失禮久失問候朝參請付法司正其罪

上姑宥之 二十四年禮部言 朝廷之禮貴于嚴

肅近者文武官入朝往往爭趨競進品級紊亂高下失

倫甚非所以明禮法振 朝綱也請自今朝參之時將

軍先入近待官員次之公侯駙馬伯又次之五府六部
又次之應天府及在京雜職官員又次之有不如儀從
監察御史及儀禮司糾覈從之

仁宗洪熙元年春正月壬申朔 上御奉天殿朝羣臣

命禮部鴻臚寺不作樂羣臣止行五拜三叩頭禮先是
禮部尚書呂震請于 上曰 陛下初登 大寶天下
文武之臣及海外諸國皆來朝宣受賀作樂如大朝之
儀不從次日震固請大學士楊士奇楊榮金幼孜黃淮
進曰 陛下言是 上曰 山陵甫畢事忍遽即吉

朕明日亦不欲出震曰四方萬國之人遠朝 新主皆
欲一覩一天顏固 聖孝誠至亦宜勉徇下情 上顧
士奇四人曰禮過矣對曰誠如 聖諭必欲俯徇輿情
亦不宜備禮 上從之故有是 命

便殿奏事儀

成祖永樂七年十月 上謂行在禮部尚書趙珰曰北京
冬氣嚴凝羣臣早朝奏事久立不堪今後朝見畢欲於
右順門內便殿奏事爾與羣臣斟酌可否於是珰同
夏原吉胡廣等議奏每日常朝 上御奉天門百官行

叩頭禮侍班候鴻臚寺官引謝 恩見辭者行禮畢
駕御右順門內便殿百官有事奏者以次入奏無事者
退治職務朔望朝如常儀 制曰可 命自十一月朔
始行之

孝宗弘治元年三月吏部尚書王恕奏言正統以來每日
止一朝臣下進見說事不過片時 聖主雖聰明豈能
盡識盡察不過寄聰明於左右之人左右之人與大臣
相見者不多亦豈能盡識大臣之賢否或得之毀譽之
言或出於好惡之私未免以直為枉以枉為直欲察識

之真必須 陛下日 御便殿 宣召諸大臣與之講
論治道謀議政事或令轉對或閱章奏如此非惟可以
識大臣而隨才任使亦可以啟沃 聖心而進於高明
矣

奏事次第

太祖洪武二十四年四月 詔更定侍班官制禮部奏定
今後文武官除承 旨文華殿啟事凡遇今陛殿禮雖
照依品級侍班如有違越失儀從監察御史儀禮司糾
劾東班則六部堂上官各部都察院堂上十三道掌印

御史通政使司大理寺太常寺應天府正佐官翰林學士侍講修撰編修春坊學士光祿寺欽天監正佐官尚寶司太醫院官五軍斷事官錦衣衛指揮各衛掌印指揮給事中中書舍人 二十九年十月 詔定各司奏事次第禮部會議凡奏事一都督府次十二衛次通政使司次刑部次都察院次監察御史次問事官次吏戶禮兵工五部次應天府次兵馬指揮司次太常寺次欽天監以次奏事則當在各司之先若 文華殿啟事則詹事府在先餘次第並同前凡晚朝惟通政司六科給

事守衛官奏事其衙門非軍情重事不許奏 詔從之

景皇帝景泰二年正月 令午朝翰林院先奏事時翰林學士周叙上疏曰臣職叨班行伏見永樂洪熙宣德三朝臨御大班既退各衙門即於門上次第說事君臣相與商確政務罄盡所言人懷畏憚而事幾不泄誠密勿廟堂之美自正統以來王振擅權獨立在旁於是輔弼大臣及近侍官員不得 召對對亦不敢盡言以釀成今日之禍宜 令羣臣依舊制輪流向前說事庶得

吐露肝膽不從

侍班備顧問

太祖洪武二十四年七月 命刑部左侍郎李似左僉都御史張構與閣門使同侍班以備 顧問百司奏事闕遺者隨事規正 二十六年七月選秀才張宗濬等俾隨詹事府左右春坊官分班入直 文華殿侍講畢說民間利害田里稼穡等事兼陳古今孝弟忠信文學才藝諸故事日以為常

忌日朝叅

國朝凡遇 帝后忌辰常朝文武官員俱着青素服黑角帶朝叅先期鴻臚寺出示知會

正旦日食免朝賀

成祖永樂十二年春正月辛巳朔日食免朝賀先是鴻臚寺奏習正旦賀儀 上召禮部翰林院官問曰正旦日食百官賀禮可行乎尚書呂震對曰日食與朝賀之時先後不相妨侍郎儀智曰終是同日免賀為當揚士奇曰日食天變之大者前代元旦日食多不受朝宋仁宗時元旦日食富弼請罷宴徹樂呂夷簡不從弼曰萬一

契丹行之為中國羞後有自契丹回者言虜是日罷宴
仁宗深悔今免賀誠當 上從之 十三年春正月丙
子朔日食免朝賀

視朝御門及平臺議政

太祖洪武二十九年春正月庚申朔 上罷朝從容問左
右民間事禮部尚書門克新對曰 聖澤深廣天下之
民各安生業幸蒙至治 上曰雖堯舜在上不能保天
下無窮民若謂民皆安業朕恐未然何得遽言至治
成祖永樂二年四月 上御奉天門 召六科給事中

諭曰朕日臨百官可否庶務或有夫中爾等宜直言無
隱又顧解縉等曰敢為之臣易求敢言之臣難得敢為
者強於已敢言者敢於君所以王魏之風世不多見欲
使進言者無所畏聽言者無所忤天下何患不治朕與
爾等勉之 四年正月 上御右順門晚朝百官奏事
畢皆趨出 上召六部尚書及近臣 諭曰早朝四方
所奏事多君臣之間不得盡所言午後事簡卿等有所
欲言可就從容陳論朕有所欲言者亦欲及此時與卿
等商確 五年四月 上謂侍臣曰朕與卿等論政事

每不覺坐久或謂朕曰語多傷氣非調養之道當務簡默為貴朕語之曰人君固貴簡默但天下之大民之休戚事之利害必廣詢博訪然後得之非好多言也侍臣對曰舜無為而治然亦好問好察適言豈舜不貴簡默哉 上曰不如是不足以盡羣情

按丘濬曰我祖宗以勤為治無日不朝而每日之間有早午晚三朝或再朝焉誠以自古禍亂之端皆起自蒙蔽蒙蔽之由起自上下之情不通上下之情不通起自君臣不相接見然使接見而不相親問答猶不見也故

聖祖 親製大誥首篇以君臣同游為開卷第一義所以示萬世 聖子神孫者至矣

憲宗成化四年十月吏部九卿等衙門尚書等官李秉等俱午朝失期不及入侍聯名上奏待罪 詔爾等常以勤政為言及朕視午朝却又怠慢既引咎姑宥之 五年八月 上復視午朝

孝宗弘治三年十一月因彗見求言刑部侍郎彭韶言臣獲隨午朝竊見日奏尋常起數於事無補願 陛下自今午朝惟議經邦要務如大陞除大災異緊急錢糧邊

關軍政工程四犯之類各令該衙門先期開具事由候
駕御左順門就於 御前公同計議取 旨奉行仍
乞 溫顏俯詢曲折如此不惟世事日達於 聖聰而
羣臣邪正亦因可見既不廢干朝之典又可令羣臣率
作興事 上嘉納之 十年三月 命司禮太監韋眷
至內閣 召徐溥劉健李東陽謝遷至 文華殿 上
命左右取羣臣章奏付溥等看詳相與議定批詞以次
陳奏 上或更定二三字或刪去一二句批畢發出中
有山西巡撫及禮部諸疏皆從容顧問擬議停當然後

批答 賜茶而退李東陽謂自天順未至今三十餘年
間嘗 召內閣不過一二語是日經筵罷有此 召因
得以窺 天質之明睿 廟筭之周詳庶幾都俞吁咈
之氣象 八月 上御平臺 召輔臣詳政事 又大
學士劉健等上言自古願治之君必早朝晏罷日省萬
幾 祖宗黎明視朝每日奏事二次過者 視朝太遲
散歸或至昏黑四夷朝貢奚所觀瞻庶府文移多致寢
閣矧今各邊啟釁四方游災尤為可慮怠荒是戒勵精
是圖庶可以回 天意慰人心也 上嘉納之 四月

上御平臺 召劉健李東陽謝遷議政事 十五年
十二月 上召兵部尚書劉大夏左都御史戴珊問曰
邇聞軍民多不獲所焉得天下太平大夏對曰求治亦
難太急唯行所當行久之天下自治 上曰閣臣如劉
健亦可計事願其所與之人太雜耳渠嘗獨薦一人甚
不愜朕意亦不言其姓名明日大夏詢之內使陳寬寬
曰劉學士曾薦副都御史劉宇才可大用 上不答劉
學士再言之 上亦不答當時已服 上之知人云
十六年五月 上御文華殿 召劉大夏 諭曰事有

不可每欲 召卿商確又以非卿部內事而止今後有
當行當罷者卿可以揭帖密進大夏對曰不敢 上曰
何也大夏曰 先朝李孜省可為鑑戒 上曰卿諭國
事豈孜省營私害物者比乎大夏曰臣下以揭帖進
朝廷以揭帖行是亦前代斜封墨勅之類也 陛下所
當行遠法帝王近法 祖宗公是公非與衆共之外付
之府部內咨之閣臣可也如用揭帖因循日久視為常
規萬一匪人冒居要職亦以此行之害可勝言此甚非
所以為後世法臣不敢効順 上稱善允之

續文獻通考
按宋藝祖謂李沆獨無密啟沆對曰臣為宰相公事則公言之何用密啟夫人君公聽並觀于大廷之上而奸邪猶且混淆國是矧密啟乎當時謂沆不惟得宰相之大體而寔人君之大防也劉大夏與李沆之貽謀遠慮其真後先一揆矣 時刑部尚書閔珪讞重獄忤旨批答久不下一日劉大夏入對便殿 上因語及之對曰人臣執法不過效忠 朝廷珪所為無足異 上曰且道自古何君何大臣如此對曰臣幼讀孟子見舜為天子準陶為士瞽瞍殺人臯陶亦執之而已似未可深

責 上頷之明日允珪所擬 劉大夏議革騰驤四衛

軍士 上召大夏密議又及裁抑內臣事大夏至榻前

上左右顧近侍解 上意將有密語即退避大夏侍

上語久欲起不能 上命司禮太監李榮等扶掖出

左順門外榮且扶且請曰吾輩多過失望於 上前

隱惡揚善大夏曰 聖上天性聰明吾於政事外未嘗

敢毀譽他人今日以老求退 上曰李榮每在朕前說

卿是好官吾與君踪跡疎遠不知何以有此榮曰當朝

大臣公為第一榮何敢蔽賢也 十八年四月 上召

劉健李東陽謝遷至煖閣袖出數疏指一揭帖曰此廣東巡按御史聶賢所奏地方盜賊事須緊責鎮巡官劉健對曰昨所擬已是切責上曰然凡一應事務當興當革者皆責在鎮巡今都不見奏報更須加緊皆應曰諾上又指二疏曰此南京科道劾兩京堂上官作何處置健等對曰進退大臣事重臣等不敢輕擬上曰彼首言崔志端是道士出身先年亦有道士掌印者但不多耳健對曰固然上又曰彼言周季麟喪師失律者非止一人健等曰季麟亦是好官上曰然洪鍾在

薊州時以潮河川開山致損人命故人論之不已健亦對曰洪鐘亦好李東陽曰好處儘多上曰彼言卑諂大臣要剛正有氣節若果有卑諂之行當退但亦無指實難遽退耳健曰皇上每值糾劾欲求實跡最是上曰若大臣有曠職壞事者誠宜黜戒今亦無甚不好者須皆留辦事耳健等奏曰臣等每見留着辦事之人竊有未安大臣宜甄別賢否若槩云留着辦事即係該退之人姑容不退中有好者似不能堪上笑問曰然則先生輩意欲如何處置皆對曰止云照舊辦事

可耳 上曰然又指一疏云太常寺欠行戶錢鈔昨有
旨查洪武等錢緣何市不通使戶部查覆未明仍須
別爲處置務使通行健等皆對曰此須自 朝廷行起
如賞賜折俸之類在下如鹽鈔船鈔亦用舊錢乃可通
行且民間私鑄低錢聽其行用 本朝通寶乃不得行
誠非道理謝遷對曰昨令查議正欲通行但私錢不禁
則官錢決不能行前年鑄弘治錢曾禁私錢不二三
日即濫使如故 上曰何故如此皆對曰只是有司奉行
不至 上曰今須嚴禁東陽奏曰臣等訪得今所鑄錢

徒費工料得不償夫亦是有司不肯盡心若是如此雖
鑄何益遷曰昨令查已未鑄造數目亦是此意 上曰
然健等因奏曰今 國帑不充府縣無蓄邊儲空乏行
價不償正公私困竭之時鑄錢一事最為緊要其餘若
屯田茶馬皆理財之事不可不講也東陽因奏曰益法
尤重今已壞盡各邊開中徒有其名商人無利皆不肯
上納矣 上問曰商人何故不肯上納健等因極論奏
討之弊 上曰奏討亦只是幾家東陽奏曰奏討之中
又有夾帶奏討一分則夾帶十分商人無利正坐此等

弊耳 上曰夾帶之弊亦誠有之徧等又言 王府奏
討亦壞鹽法每府祿米自有萬石又奏討莊田稅課
朝廷每念親親輒從所請常額有限不可不節 上曰
王府所奏近多不與皆對曰誠如 聖諭但乞今後更
不輕與則不敢奏矣徧因奏曰臣聞 國初茶馬法初
行有歐陽駙馬者販私茶數百斤 太祖皇帝曰我纔
行一法乃首壞之遂寘極典 高皇后亦不敢勸止此
等故衆人皆不敢言 上曰非不敢言乃不肯言耳因
言鹽法須整理遷等贊曰請下戶部查議 上曰然明

日降 旨云 祖宗設立鹽法以濟急緊邊儲係 國
家要務近來廢弛殆盡商賈不行各邊開中雖多全無
實用戶部便通查舊制及今各項弊端明白計議停當
來說於是中外稱慶知 上意勵精思治如此是日
天顏甚霽問答詳悉藹然家人父子之風誠前古所罕
見也復 召輔臣至煖閣 上問曰昨管河通政奏巡
按御史陸偁私寄書二冊題曰均徭則例又擅革接遞
夫役若干名陸偁為御史奈何寄人私書于理不當且
夫役係是舊例何得擅減李東陽對曰觀奏詞恐所寄

即是則例 上曰書自是書皆不敢答劉健對曰均徭事亦是御史所管 上曰何為不奏健曰然則罪之乎 上曰今日陸偁已批姑令回話縱不深罪亦須薄示懲戒皆應曰諾 上又出一疏曰此戶部覆奏處置流民疏內推刑部侍郎何鑑查已服滿此須會吏部戶部安得自推健對曰凡係本部承行事亦有徑推者 上曰此前人不是吏部銓衡之職推舉人才乃其職掌若使會推他日不稱亦無後詞健東陽皆對曰何鑑誠是好官能了此事 上曰何鑑雖好終要經由吏部健曰

然則通令吏部會議 上曰處置流民是戶部事只用是字答之不須再會吏部惟所推官員須會吏部耳皆諾而出蓋 上既明習國事論議層出或累數十言臣下欲盡一二語至無間可入或不竟其辭而退

按嘉靖間霍韜曰天下有論職官減否政事得失者初付之內閣內閣惟擬定浮帖進 上委之左右由是有事涉左右者因得旁訴倖免有乘機欺罔者妄言事體不便或曰格例不合或曰人情不堪甚則曰外臣朋黨護短徇私故內閣原議時有改易動駭人心矣請自今

每日午刻或 御文華殿或 御左順門 召內閣大臣二員六部尚書侍郎六員六科給事中六員講讀學士二員侍立將應發章奏條擬 旨意斟酌填註大臣有奸回不忠面肆欺罔者給事中得以面糾其過有古今異宜稱量輕重者講讀官得以備其顧問如此則在上為虛心守正以聽天下而無諱過護短之私大臣為取人以善而無私妬賢之罪內臣亦得安靖美名而無招權壞事之謗矣

賜坐儀

太祖洪武十六年 詔定朝參官員坐次凡 奉天門

賜坐公侯至都督僉事坐于門內守衛指揮坐于都督僉事之後稍南六部尚書及署都府事官坐于門外皆東西向六部侍郎十衛指揮應天府尹國子祭酒翰林院官諫官僉都御史坐于西角門東向若 華蓋殿則公侯及都督僉事坐于殿內尚書及署都督府事官坐于鹿頂內皆東西相向六部侍郎及十衛指揮應天府尹國子祭酒翰林院官諫官僉都御史坐于鹿頂外東西相向

續文獻通考
按國初大臣如魏國公達等不時賜宴預坐及學士承旨宋濂等隅坐講論至仁宗亦然正統以後廢矣雖孝宗之敬禮閣臣世宗之寵眷張夏叩頭長跪不聞坐論也嘉靖末分宜賜坐一次惟真人陶仲文召對賜坐無筭乃至陶坐南西嚮上坐北東嚮以陶坐繡墩上亦坐墩不設御坐入則迎于廷出則送至門握手乃別遇尤殊矣

導駕儀

文華殿凡遇千秋冬至正旦行慶賀禮導駕官舊制

用翰林春坊給事中各二員天順初憲宗正位東宮本院春坊官俱以未習導駕禮儀因遜給事中前行後遂襲立其次既而春坊官復立其上惟本院仍次之至不安其下而用博士待詔等官天順二年博士等俱以陞出時尹直及童大章當冬至導駕入文華殿內有給事某指以序直若不論其意第答云承見教直因自以翰林春坊從來一體吾第從春坊官行立庶不失儀給事遂立直下班後遂因之爲例然亦蒙朝廷所定也

侍班儀

國家凡 御殿行大慶賀傳 制禮用翰林講讀以下
 官二員侍班是早必先入至中左門候門開與眾執事
 官進 華蓋殿直舍內行五拜三叩頭禮畢即先出東
 門星馳循 殿臺而下出 中左門沿斜廊而上入
 殿至樂懸處立俟 駕過升座乃入班立入 寶卓之
 南糾儀御史之右稍遲則 駕從中出將軍立定不容
 入矣故侍班官每於直舍行禮時須立近東南先出而
 馳斯不失儀呂逢原有韻語云立宜邊走宜先階三級

足毋偏沿廊而上樂盡而旋寶卓之南於斯立焉又
 制早朝班定鴻臚宣贊謝 恩見辭行禮畢各官將奏
 事皆預咳一聲文武班中不約而同聲震如雷俗謂之
 打掃其有痰咳不可忍者許引退自便宣德間曾祭以
 痰咳作於班中引退 上遙見之 勅免其常朝成化
 中 文華殿開經筵時戶部尚書馬昂以將咳退出
 殿門外俟講畢仍同行禮尹直瑣綴錄載昂事且曰此
 予所親見餘未見有敢先退者蓋昂初為序班故尚習
 此例其他見此不以為異則以為失儀矣

朝參儀八條

太祖洪武丁卯冬定朝參禮凡八條 一曰朝班序立公侯居文武之首班次駙馬次伯自一品以下各照品級爲班文東武西風憲糾儀官立于前北向紀事官居文武第一班之後稍稍近 上以便觀聽不許攙越如奏事則從班末行至 御前跪奏不得於班內穿過 二曰凡文武百官於 御前侍坐遇有奏事官必須起立候奏事畢復坐毋踞坐如特 賜則坐 三曰凡文武百官出入朝門如一品官遇公侯駙馬皆旁立行則隨

之三品四品遇一品官旁立行則後從三品四品官遇一品官加遜禮行立俱後從五品以下官倣此俱不許攙越失儀如有 宣召不在此限 四曰凡百官朝參奉 聖諭教誡拱聽分明即便省身克己毋放肆馳驅 五曰凡百官自入 午門內不許咳唾如朝參近侍御前有患疾者即許退班 六曰凡百官 御前奏對從實知則為知不許妄對 七曰凡大小官員如隨駕行丹墀身常向北或左或右環轉隨侍不許背之 如 上位陞 奉天門及 丹陛其隨從官員不得徑

續文獻通考
行中道及 御道如有 旨方於側邊行 八曰凡百
官入 朝門須拱手端行威儀整肅毋行私揖禮

筵宴儀二條

一曰凡文武百官遇宴四品以上文東武西各照品侍
坐 殿內五品以下於 殿外丹墀內序坐其奉特
旨賜殿內座者坐之如在 奉天門則公侯坐門內四
品以上坐門外五品以下于 丹墀內各照品文東武
西肅容毋得撓越誼慢 二曰凡百官於 奉天 華
蓋 謹身 武英等殿侍宴奏對皆穿禮鞋上 殿違

者罪之

出使儀

使者奉 詔書至總兵官處先近營十里許遣人報知
總兵官即營內設香案南向列金鼓旗仗總兵官即率
諸將出營迎接見使者即下馬立道旁候 詔書過始
上馬從後至營門各下馬使者前行總兵官并衆官後
從至營內使者捧 詔書置于案使者立案東西向總
兵官并衆官行四拜禮使者取 詔書受宣讀官衆跪
宣讀畢以授使者復置于案衆官皆俯伏行四拜禮畢

使 者 西 向 總 兵 官 東 向 相 見 行 兩 拜 禮 遂 各 相 向 叙 坐
如 使 者 奉 有 制 諭 勅 符 手 詔 至 總 兵 官 處
係 干 機 密 軍 務 徑 抵 其 營 外 先 密 遣 報 知 總 兵 官 設 香
案 南 向 總 兵 官 出 營 迎 接 使 者 捧 制 諭 勅 符
前 行 總 兵 官 後 至 營 使 者 取 置 于 案 立 于 東 西 向 總 兵
官 行 五 拜 禮 畢 屏 去 左 右 使 者 奉 制 諭 勅 符
授 總 兵 官 開 看 畢 仍 收 卷 置 于 案 遂 各 立 行 相 見 兩 拜
禮 畢 仍 各 東 西 相 向 序 坐

官 員 拜 禮

凡 朝 見 稽 首 頓 首 五 拜 臣 見 君 之 禮 也 先 稽 首 頓 首
四 拜 後 一 拜 叩 頭 成 禮 稽 首 四 拜 者 百 官 見 東 宮 親
王 之 禮 也 凡 見 父 母 亦 行 四 拜 禮 其 餘 官 長 及 親 戚 朋
友 相 見 止 許 行 兩 拜 禮 凡 公 侯 駙 馬 相 見 各 行 兩 拜 禮
一 品 官 見 公 侯 駙 馬 一 品 官 居 右 行 兩 拜 禮 公 侯 駙 馬
居 左 答 禮 二 品 見 一 品 二 品 居 右 行 兩 拜 禮 一 品 居 左
答 禮 三 品 以 下 如 之 但 尊 者 答 受 任 從 其 宜 如 有 親 戚
尊 卑 之 分 從 行 私 禮 又 定 官 員 公 座 禮 凡 大 小 衙 門 官
員 每 日 公 座 行 肅 揖 禮 佐 貳 官 揖 長 官 長 官 答 禮 首 領

續文獻通考
官揖長官佐貳官長官佐貳官拱手屬官見上司官必
序立堂陛之上總行一揖上司官拱手首領官答揖其
公幹節序見上司官皆行兩拜禮長官拱手首領官答
禮

公聚序坐禮

凡文武官公聚皆依品級序坐若資品相同者各照衙
門次第若 王府官屬與朝官坐立各照品級俱在朝
官之次後丘濬著論曰臣按前代朝儀無一定之制
一日三朝儀

丘濬有曰我 朝自 祖宗以來至于今日率循舊章

一日三朝自古帝王所無也每日晨興 上便服 御

奉天門文東武西待鳴鞭畢鴻臚寺序班唱入班百官
行叩頭禮分班侍立翰林學士侍 御座左錦衣衛官

交陛西立六科給事中分侍左右御史分班北向立鴻
臚官屬立其後先日謝 恩見辭者於鴻臚寺報名至

日先進 午門外候百官叩頭畢五府六部以次奏所
司合行事次通政司引入於 御前面奏請 旨該司
官出班承 旨大理寺以下有事出奏無則已次禮科

差使考滿官員次六科合奏 旨意題本守衛揭帖賞銀鈔錠次鴻臚宣奏藩府邊鎮所遣使臣 上命以酒飯賞賜既而兩京堂上官新任官及在外三司乘朝赴任者面叩頭畢鴻臚卿唱奏事畢羣臣側身向上立鳴鞭畢 上乘輦御往 武英殿或 文華殿閱章疏日率如此至午復出朝晚亦如之此每日常朝之制也每月朔望 上具皮弁服 御正殿百官公服叩頭畢分班侍鴻臚卿奏謝 恩見辭員數畢 上出 奉天門視朝如常儀臣竊考前代之制有所謂捲班放仗入閣實為得中

朝賀雜儀

太祖洪武二十年冬十月 諭大臣曰近者臣僚尊卑體統多未得宜爾等宜著禮儀以為定式乃會官著為禮儀定式一書凡三十七條所謂朝參之禮有八焉頒行既久而奉行者偶因一時之便遂襲以為故事傍觀者雖知其非而不復以為言後來因以為當然者亦或有之後臣僚奏曰切觀前代朝會班次儀注皆著成圖式

載在文獻通考諸書者可考也乞勅大臣及翰林院鴻臚寺官將累朝實錄及禮儀定式等書并稽洪武永樂年間以來事例詳加講究彙括節畧畫為圖式懸於兩長安門用以表正百官觀示列辟俾人人知所趨避世世得以遵守永為定制

英宗正統元年正月丁卯朔始赴禮部行朝賀禮先是南京文武百官于闕庭遙拜至是議以行在將定昇駕決不復南始赴禮部拜牌如外藩之儀

景皇帝景泰辛未冬至節禮部請朝賀上皇于東上門

詔免賀初京中最重冬至年節賀禮不問貴賤奔走往來者數日家置一冊題名滿幅其鴻臚尚寶中書六科等朝下即交相稱賀是日鴻臚佐貳邀太監據公偕走賀公曰太上爺爺不得一見尚誰賀耶京中冬至賀禮自此漸廢庚午冬十一月太上皇萬壽聖節禮部請羣臣朝賀詔免朝時給事中葉盛李聰等約欲具疏偕科道及禮部等官同奏既而盛云今皇上孝弟上皇盛德兩宮帖然安靜而長久當誼愈深而禮愈隆矣使益以言更生端隙遂已一日御史盛景以

續文獻通考
一章疏私示盛亦及此事盛具以告景曰盛言已不為
又沮人不為耶盛曰此大事宜熟慮之時惟劉溥以盛
之言為然

憲宗成化十三年奏准文武官員入朝大臣常川許帶官
吏頭目每人二名若遇陰雨大臣添一人小官許帶一
人各執雨具 又例朝覲外官及舉監人等不許擅戴
暖耳入朝

世宗嘉靖元年奏准失儀官員應面糾者御史照舊先糾
若御史不糾許序班糾但不許越次 六年令凡 奉

天門早朝畢 聖駕下階南行兩班官員不許輒便退
班與 御轎並行亦不許吐唾語話序班往來巡視有
違犯者堂上官具奏其餘即時拏赴 御前治罪 九

年題准各文武衙門公差官員奉有 勅書責限完事
及公所寫遠不便趨朝者方許于門籍註差仍註門奉
何 勅書公所在何處以便查考其患病若止係咳嗽
等小疾于朝儀有礙者量許註門籍五日若病非旦夕
可愈者必須堂上印信手本開寫明白其有累月不朝
及全司稱病者文官聽吏科武官聽兵科每月終按籍

經三虞通考
查出糾舉其屢經糾劾文官至三次武官至五次吏兵
二部竟自奏聞區處 是年令常朝官叩頭畢內閣官
于東陞錦衣衛官于西陞各以次陞立于 寶座之東
西錦衣衛官在司禮監官之南遇有 欽差官及四夷
人等領 勅翰林院詹事府左右春坊司經局堂上官
輪流一人捧 勅立于 內閣官之後稍上候領 勅
官 面辭捧 勅下立于 御前候承 旨訖由左陞
而下循 御道邊行授與領 勅官仍回至本班立
今上萬歷三年題准常朝該日記注起居史官四員列于

東班各科給事中之上稍前以便觀聽 四年議准五
府都督官朝班次不當入侯伯班仍照殿班立于錦衣
衛官之後稍上待錦衣衛堂上官詣金臺邊北司官于
臺下各侍立仍與南北司執事官同班而序于其上
又令朝班每日都察院輪委監察御史二員侍班糾察
失儀 又議准予左右掖門內各設序班分立東西與
原設催促入班序班二員一同糾察有喧譁說話者即
時記認候奏事畢一併糾舉 十一年令于金水橋邊
增設序班三員北向站立俟東西兩班站定各于班末

熟視有回顧耳語咳嗽吐唾者即時糾舉其京堂四品
以上翰林院學士及領勅官俱不面糾十二年議
令吉服朝參日期除祭祀齋戒不面糾外其餘照常糾
儀又令叅將見朝在京營者照京官儀不贊跪在外
者照外官儀贊跪失儀俱面糾十四年令早朝遇雨
門上奏事糾舉失儀人員序班一員拏住一員門上面
奏二十六年令凡文武百官于奉天華蓋武
英等殿奏事必須穿着履鞋方許入殿違者從糾儀御
史禮部儀禮司官糾劾送法司如律問罪近儀凡早

朝鼓起文武官各于左右掖門外序立候鐘鳴開門各
以次進過金水橋至皇極門丹墀東西相向立候
上御寶座鳴鞭鴻臚寺官贊入班文武官俱入班行
一拜三叩頭禮分班侍立鴻臚寺官宣入謝恩見辭
八員傳贊午門外行禮畢鴻臚寺官唱奏事各衙門
應奏事件以次奏訖御史序班糾儀無失儀官則一躬而退鴻臚
寺官跪奏奏事畢鳴鞭駕興百官以次出

朝覲儀注

今上萬歷五年定凡朝覲兩京府尹行太僕寺苑馬寺卿

布按二司俱于十二月十六日朝見外班行禮畢由右掖門至 御前鴻臚寺官以次引見其鹽運使及府州縣有司官吏浙江江西十七日山東山西十八日河南陝西十九日湖廣南直隸二十日福建四川二十一日廣東廣西二十二日雲南貴州二十三日北直隸二十四日各朝見外班行禮畢仍至 御前鴻臚寺官引見如遇是日免朝各官至于外班行禮候 御朝之日仍補行引見禮二十五日以後例該常朝除兩京府尹照京官品級一體行禮序立外其行太僕寺苑馬寺卿布

按二司入至 皇極門前隨班行禮畢于文班內序立于京官之下各以次遞降一等知府知州知縣及諸司首領官吏土官衙門把事土吏人等 午門外行禮畢東西分班序立正旦朝賀各官俱入殿前行禮其餘陞殿日期行太僕寺苑馬寺卿布按二司仍于殿前隨班各降一等序立鹽運司知府以下于金水橋北東西序立其行禮俱如常儀 凡朝覲官見辭謝 恩不論已未入流各具公服行禮正旦朝賀各具朝服不許僭着朱履凡遇常朝俱穿本等錦繡服色 獎賞廉能先期

內官設 御座于 會極門之北設賞案稍東文武執事奏事等項官員各具吉服并序班引廉能官員各具青錦繡服至期俱于左掖門內斜廊面北序立管將軍官侍衛官俱于 會極門礮礮下立候 駕出 上陞御座聽傳呼 內閣并執事奏事等項官員由由大礮礮下序班引廉能官由斜廊行至東廊小礮礮下面東立候管將軍官并侍衛官鴻臚寺掌印官以次立于御座東西向鳴贊一員立于 御座東西向將軍四員分立于 御座南北向各立定 內閣并執事奏事等

項官員至大礮礮上鴻臚寺掌印官贊入班各官照班次序立鳴贊贊鞠躬行一拜三叩頭禮畢 內閣并吏部都察院堂上官禮部錦衣衛掌印官吏科都給事中掌河南道御史禮部郎中俱于 御座西面東序立侍班御史二員序班二員俱于 御座南面北立執事序班四員于賞案稍南西立鴻臚寺掌印官贊奏事贊起案序班舉賞案置于 御前稍南贊引廉能官序班引廉能官立于案南照班次序立鳴贊贊跪廉能官跪鴻臚寺掌印官贊吏部等衙門過吏部都察院吏科都給

事中掌河南道御史過中跪吏部堂上官奏後面跪的
是廉能官見在應某省某等若干員奉 旨引來聽候

獎賞奏知奏畢起身一躬入班鳴贊贊叩頭廉能官

叩頭候 天語獎諭承 旨叩頭 上曰與他每 賞

賜還與酒飯喫鴻臚寺掌印官并禮部郎中承 旨畢

鳴贊贊叩頭廉能官叩頭畢起身一揖一躬序班引下

鴻臚寺掌印官贊起案序班舉案置于原所吏部都察

院堂上官吏科都給事中掌河南道御史過中跪致詞

仰惟 皇上留心吏治澤被生民臣等不勝慶忭叩頭

稱 賀鳴贊贊叩頭吏部等官叩頭畢起身一揖一躬

入班鴻臚寺掌印官過中跪奏事畢候 駕興各官

退 凡大班糾劾朝覲官考察存留者鴻臚寺官引上

御路跪法司及科道官各露章糾劾怠職之罪朝覲

官俱俯伏免冠待罪候 旨如奉 旨免宥隨即加冠

叩頭連呼萬歲次日謝 恩仍前朝參 凡朝覲官事

完辭朝兩京府尹行太僕寺苑馬寺卿布按二司外班

行禮畢仍照前引見面辭監運司知府以下等官止于

外班行禮 七年 諭張真人方外之流無民社寄其

朝覲免行 九年題准衍聖公及顏曾孟三氏子孫止
許三年一次入 賀于朝覲年行

續文獻通考卷之一百十九終

續文獻通考卷之一百二十

皇明進士雲間王圻纂輯

王禮考 朝儀二

經筵日講始末

太祖既有婺州遂分置中書省 召儒士許瓊葉瓚胡翰

吳沈汪仲山李公常金信徐藻童義戴良吳復張起敬

孫履等皆會食中書日 召二人進講經史敷陳治道

此論道講學之始 乙巳春正月 上御端門論及黃石公三

畧且口釋之起居注宋濂對曰尚書二典三謨帝王大

經大法靡不畢具願 主上留意講明 上曰吾非不知典謨為政治之要但三畧乃用兵攻取時務所先耳是日遂 命濂以尚書進講 是年始置博士廳 令博士許存仁等日講尚書等書及改元洪武之初每令文學侍從之臣于 御前講說經史無定日亦無定所既而設 華蓋 文華 武英等殿說書以儒士沈德等為之未幾改翰林官及殿閣大學士專其事遂罷說書然每進講必反復討論以求通義理之極講畢必議及政事以為常 洪武三年庚戌春二月 上御東閣

命學士宋濂待制王禕進講大學傳之十章濂等反覆解說至有土有人 上諭之曰人者國之本德者身之本德厚則人懷人懷則國固故人主有仁厚之德則人歸之如父母人心歸則有土有財自然之理也若德不足以懷衆雖有財亦何用哉 十六年癸亥秋八月 上御謹身殿 命東閣大學士吳沈等進講周書立政至罔有立政用儉人 上嘆曰有小人必敗君子故唐虞任禹稷必去四凶魯用仲尼必去少正卯沈進曰小人懷奸甚似忠信不可不察 上曰然 十八年甲

子秋九月 上御 華蓋殿大學士朱善以周易進講
至家人卦 上嘆曰齊家治國其理無二使一家之間
長幼內外各盡其分事事循理則一家治矣一家既治
達之一國以至天下亦舉而措之耳朕觀其要只在誠
實而有威嚴誠則篤親愛之恩嚴則無閨門之失善對
曰誠如 聖諭又一日 御華蓋殿召善進講心箴畢
上曰人心道心有倚伏之機蓋仁愛之心生則伎害
之心息正直之心存則邪詖之心消羞惡之心形則貪
鄙之心絕忠慤之心萌則巧偽之心伏常持此心不為

情欲所蔽至公無私自無物我之累耳

成祖永樂二年甲申夏六月朔 御文華殿大學士楊士

奇以大學講義進 上覽其文善之因諭之曰帝王之

學貴切己實用講說之一切浮泛無益之語勿用且先

儒謂克明峻德一章一部大學皆具士奇對曰堯舜禹

湯文武數聖人凡修諸躬施于家國天下者皆大學之

理誠 聖學所當先務 是年秋八月學士解縉以大

學正心章講義進 上覽之因 諭縉等曰人君誠不

可有所好樂一有好樂流而不返則欲必勝理若心能

續文獻通考
靜虛事來則應事去則忘如明鏡止水自然純是天理
朕每退朝默坐未嘗不思管束此心為切要思為人君
但于宮室車馬服食玩好無所增加則天下自然無事
矣 命翰林春坊諸臣分撰諸經講義與閣臣再閱有
未當處悉與改正然後呈講乃以解縉屬書胡廣屬詩
金幼孜屬春秋楊士奇屬易其義有疑必 召四人辨
析暢而後已

宣宗宣德二年丁未春二月己酉 御文華殿 召翰林
進講離婁篇至二老歸文王章問曰伯夷太公皆處東

海而歸文王及武王伐紂太公佐之伯夷叩馬而諫所
見何以不同講官對曰太公以救民為心伯夷以君臣
為重 上曰太公之心在當時伯夷之心在萬世無非
為天下生民也 三年戊申春二月進講舜典 上曰
觀二典三謨則知萬世君臣為治之道不出乎此歷象
日月星辰以閏月定四時天道以明治水土奠高山大
川別九州任土作貢地道以成克明峻德以至協和萬
邦入道以建九官十二牧所堂禮樂刑政養民之道後
世建官繁簡雖不同 要不出乎此當時君臣都俞吁

弗更相告戒用圖治功氣象藹然何後世之不能及講
臣對曰明良相逢故治化之盛如此 上又曰天生聖
人為後世法孔子刪書斷自唐虞使人知有堯舜所謂
萬世帝王之師也 是年冬十月庚寅進講春秋 上
曰聖人匡世之功憂世之心備見此書當時先王禮樂
法度日以隳廢亂臣賊子接迹而起有此書而後天下
知尊周 又曰孔子作此書以尊周為本孟子乃以王
天下勸齊梁之君何也對曰孔子之時天下猶知宗周
孟子之時不復知有周矣 上曰聖賢之心實為天下
生民計孟子時不有王者興何以解生民之塗炭因
命左右出菜茗以賜講官

按 我朝自宣德以前每視朝畢無日不 御文華殿
或便殿 召大臣及諸儒臣講經書咨政事時經筵未
有開也殿閣詞林云洪武中令儒臣更番入 禁中每
日輪一員進講侍直誤者罪之如大學士吳沉嘗坐進
講遲誤被劾永樂以後多渥典自設經筵後講官不復
入直惟令翰林及春坊經局等官相輪侍班久之選為
展書官又自展書乃得充月講官若日講則用年資深

而品秩尊者又云 祖宗時講官于講書後得言時政
闕失及陳論所見 成祖寶訓云 上視朝之暇輒
召儒臣至便殿閱書史或 召翰林儒臣講詢永樂以
後蓋莫不然

英宗正統元年春二月始開經筵遂 命禮部翰林院詳
定講筵禮儀著為 制時 上以幼冲嗣位大學士楊
士奇等奏云去年十月 宣宗皇帝御左順門 召臣
士奇輩諭之曰明年春暖 東宮出 文華殿講書凡
內外侍從慎擇賢良庶謹之臣未幾不幸 先帝上賓

臣未敢遽言此事至重不敢久默今 山陵事畢乞早
開經筵以進 聖學預 命禮部吏部翰林院公同慎
擇講官必學問貫通言行端正老成重厚識達大體者
以供其職又曰 天子就學其事體與 皇太子親王
不同乞先 命禮部翰林院詳定講筵禮儀 制曰是
以今月初九十九日 御經筵爾翰林春坊儒臣分直
侍講乃 命太師英國公張輔知經筵事少傅兵部尚
書兼 華蓋殿大學士楊士奇少傅工部尚書兼 謹
身殿大學士楊榮禮部尚書兼學士楊溥同知經筵事

詹事府少詹事兼侍讀學士王直少詹事兼侍講學士李時勉錢習禮陳循侍讀苗衷侍講高穀修撰馬愉曹鼐兼經筵官仍 賜宴及金幣有差遂為定制 續定經筵儀注每月三日日以逢二為期歲率以二八月中旬起四十月末旬止用勲臣一人知經筵事 內閣大學士一二人同知經筵事六部尚書左右都御史通政司大理寺卿及學士等官侍班翰林院春坊等官及國子監祭酒二員進講二員展書給事中御史各二員侍儀鴻臚寺錦衣衛堂上官各一員供事又鳴贊一員贊

禮序班四員舉案侯伯各一人領將軍侍衛先期直殿中官于 文華殿設 御座及設 御案于 御座之東稍南講案于 御案之南稍東是日早司禮監官先陳所講四書經史各一冊置 御案又各一冊置講案先四書東經西史先期輪講官撰四書經或講章各各一篇預置于冊內是日早 上御 奉天門早朝畢退 御文華殿陞 御座將軍侍衛如儀鴻臚寺官引知經筵及侍班講讀執事侍儀等官于 丹陛上行五拜三叩頭禮畢以次上殿依品級東西序立知經筵官序

于侍班官上侍儀御史給事中各二員于殿內之南分
東西北向立序班二員舉 御案置 御座前二員舉
講案置 御座之南正中鴻臚官贊進講講官一員從
東班出一員從西班出詣講案前稍南北向並立鴻臚
寺官贊鞠躬拜叩頭興平身畢展書一員從東班出進
詣 御案前跪展四書畢退立于 御案之東東稍南
講官一員進講詣 御前立奏講某書講畢稍退展書
官復詣 御案前跪掩四書畢退就東班又展書官一
員從西班出進詣 御案前跪展經畢起退立于 御

案之西稍南講官一員進至講案前立奏或某經或某
史畢少退仍展書官復詣 御案前跪掩書畢退就西
班鴻臚寺贊講官鞠躬拜叩頭興平身禮畢各退就東
西班序班二員舉講案退置原所鴻臚寺官贊禮畢
命賜宴鴻臚寺等官及講官皆跪承 旨光祿寺官設
宴于 左順門宴畢叩頭出正統初立制如此 天順
八年秋八月即位遂開經筵日講期如舊每兩人一
書一經講章皆預呈 內閣轉付中書繕錄正副各一
紙先日進司禮監官奏知先一晚于 文華殿內 寶

續文獻通考
座地平之南設香鶴香爐左右各一于左香爐之東稍南設御案講案各一皆西向案上各置所講二書以夾講章各壓以金尺一副至期早朝近侍內臣及知經筵官并內閣大學士及講官六部尚書都御史大理卿通政使鴻臚卿錦衣指揮使及四品以上寫講章官俱綉金緋袍其展書翰林官侍儀御史給事中序班鳴贊等俱金綉服朝畢駕起御文華殿皆隨之大漢將軍凡二十名導駕至左順門上退易冠帶便服其侯伯或一人服金綉蟒衣仍領將軍趨越衆官進

左順門皆分班綴行立文華殿外俟傳宣云進來則將軍先入殿內負東西牆立諸官陞陞鴻臚寺卿贊入班行禮畢以次分由殿東西門入重班立指揮則立西一班末稍前御史給事中序班六員分于中門左右北向立序班二人舉御案進上二人舉講案置中鳴贊唱進講講官各出班立講案前展書官二員出班對立鳴贊唱講官並行禮興東展書官進至地平膝行詣御案展四書官亦稍前近案俟展書官復位乃先說講某書然後申講講畢掩書稍退後原展書官仍如儀

進掩書復位西展書官與講經官進退俱如前儀講畢
仍並行禮各回班序班各撤案置舊所鴻臚寺卿中跪
奏禮畢 上命官人每喫酒飯各官跪承 旨興以次
出丹陛仍行禮乃出 左順門宴以官叙惟學士之坐
立則序于鴻臚卿及四品以上寫講章官及展書官坐
立亦序于四品以下寫講官等重職事也

會典又載各官止行叩頭禮其儀大同微異如此

按黃氏瑜有曰相傳 景皇帝時每講畢 命中官布

錢于地令講官拾之以為 恩典高穀年老俯伏不便

恒莫能得一講官拾以遺之識者病其媒瀆

孝宗弘治元年戊申春三月十二日開經筵 賜學士程

敏政等宴及白金寶鏹次日 上御文華殿後進講尚

書孟子及干進講大學衍義以為常講畢 賜茶 上

皆呼先生而不名自是四月二十八日五月二十九日

七月二十日皆盛暑不廢云時 上最嗜經筵親儒臣

學士張元禎矮小每進講 上俯几聽之 十四年辛

酉夏四月開經筵又改初四日逢二會講定期也是月

之初二日當會講以享 太廟有 旨改初三至期遇

雨又改初四日蓋 孝宗務學之勤不以事而廢如此
十七年甲子秋九月三十日 召李東陽劉健等至
煖閣先是 上御經筵罷因聽所講義退思之有得
及是亟 召東陽等至謂之曰劉機講陳善閉邪陳字
改做陳說不是止云敷陳其說乃可耳劉健因進言昨
說以善道啟沃他他字不是 上笑曰他字也不妨大
抵講書須要明白透徹直言無諱道理皆是書上原有
的不是纂出若不說盡也無進益且先生輩與翰林院
是輔導之職皆所當言謝遷對曰 聖明如此講官愈

好盡心李東陽對曰今年 聖學緝熙中外臣民無不
仰戴臣等敢不仰承 聖意 孝宗因諭之曰先生可
傳與他不必顧忌耳尋謂他字亦不妨蓋舊者多寓諛
辭至是經筵知 上意嚮每講必加以規諫而亦未嘗
少忤云

世宗嘉靖二年奏准八月二十二日恭遇 憲宗純皇帝
忌辰是日經筵官各具青綠花樣衣服光祿寺仍具酒
飯續更定具素服角帶 十年十月初二日 孝潔皇
后忌辰令經筵官服青綠花樣隨侍人員淺淡衣服

是年八月 世宗御文華殿 召講臣至首揭書經君子所其無逸章繼而講康誥惟民康又章召誥顧畏民
碧章孟子踐形章理義悅心章被袵衣鼓琴章君子反
經章是日 上御黼座橫經俯詢虚心聽納如此他日
講官劉龍進孟子至誠章 上批曰龍于至誠能動乃
云爾者黃河清是至誠之驗也未免近諛但其末云謙
以履盈約以保泰此二句却好又講官倫以訓進論語
陽膚為士師講義 上批云以訓講哀矜勿喜云是慈
悲憐憫夫慈悲二字是釋氏之教也講官魏校進書經

罪疑惟輕章講說

上批云桂萼薦校善講義朕觀其

講章並未有過人者且其前後率多諛詞難居近侍着
吏部調南京用之 十二月癸巳夏五月 召講官廖

道南進講論語高宗諒陰以下三句又明日進講大學
衍義時汪鉉為吏部尚書懇祈大學士張孚敬改題以
其有君薨聽于冢宰句也道南執不肯孚敬遂具揭帖
以進 世宗批云覽卿等奏朕悉已舊日講官徐縉講
孟敬子撤去二節人之將死不講夫死生人道之常何
諱之有如卿等言則忠讜之論何由得聞還着道南照

舊進講明日道南講畢進說云按說命夢帝賚予良弼其代予言又云其惟不言言乃雍即是以觀古之人君心純乎孝故宅憂而不暇于有言古之人臣心純乎忠故攝政而不嫌于代言然必有高宗之聖而後可以用傳說之言必有傳說之賢而後可以輔高宗之德不然則莽操懿溫之流又將以冢宰藉口于千萬世矣乎敬聞之出謂鉉曰講官欲中傷之又明日進講大學行義許敬宗立武昭儀章及李林甫嫉李邕章揚國忠比李輔國章元載陷顏真卿章盧杞嫉張鎰章李逢吉去王

守澄章江克害戾太子章乎敬滋不悅明年秋七月三日輪顧鼎臣席春進講時鼎臣飲于所識者因大醉悞期明日鼎臣懼罪向乎敬說乎敬為請因反叅道南及蔡昂不行代講遂謫道南于徽州昂湖州蓋為鉉反噬也未幾皆召還

穆宗隆慶元年定一日告奉先殿告凡筵先五日

命司禮監同各官詣文華殿演禮是日上詣文華

殿左室展禮先聖先師又定講章於前兩日先進

呈覽凡假日先期傳免

今上萬歷二年定春講以二月十二起至五月初二日止
秋講以八月十二日起至十月初二日止不必題請

日講儀

講官凡四員日輪二員先大學衍義次貞觀政要二書
皆不用講章惟各以黃票書所起止預進先日內臣設
御案于 文華殿後穿堂中以二書并起止置案上
至日早朝畢四講官同 內閣隨 駕入至殿內來日
二講官授二臣以來日起至止直講官俟 召乃入穿堂
門內行禮分班北向前後立東班當講者詣 御案前

內侍授以牙籤左右執之且指且講書則向上初展後
掩皆屬內侍講畢完籤復位西班當講者乃進講悉如
東儀講畢 上諭先生喫酒飯皆跪承 旨行禮禮前

後皆一拜三叩頭出宴于 文華門外西廡禁中謂之
小經筵或謂之小講云 會典載日講儀云凡講日

上御文華穿殿止用講讀官 內閣大學士侍班不用
侍衛侍儀執事等官侍班講讀等官入見行叩頭禮東
西分立先讀四書次讀經或讀史每本讀十數遍直講
官先講四書次講經或講史務要直說大義明白易曉

講讀後侍書官侍上習書畢各官叩頭退每三日一溫
講將前所講書通講一遍若講官中有事故同列代講
其直講則講畢補進

午講儀

穆宗隆慶六年定每日早閣臣及講官講畢各退 上進
煖閣少憩司禮監將各衙門章奏進上 御覽閣臣等
退西廂房伺候 上有所諮問即 召至 御前將本
中事情明白敷奏覽本後閣臣率領正官恭侍 上寫
字畢若 上欲再進煖閣少憩閣臣等仍退至西廂房

伺候若不進煖閣閣臣等即率講官再進午講講通鑑
節要完復講貞觀政要講官務將前代興亡事實直講
明白講畢各退 上還宮 一每月三六九視朝日暫
免講讀 上於宮中有暇將講讀過經書從容溫習或
看字體法帖隨意寫字一幅不拘多寡 一每日定以
日出時 上早膳畢出 御講讀午膳畢還宮
講大學衍義儀

世宗嘉靖六年定每月初三初八十三十八二十三二十
八日用經筵日講官二員進講 內閣大學士一員侍

班講畢 賜茶 賜酒飯俱如日講儀

無逸殿講儀

世宗嘉靖十年定 先一日司設監官於 無逸殿設

御座 御案及講案如 文華殿月講之儀是日質明

上具常服乘輦至 無逸殿門衆官於門外迎候

上降輦乘板輿至殿內降輿陞 御座鴻臚寺官贊各

官於殿門外入班行一拜三叩頭禮畢進入殿內各照

品級東西序立序班二員舉 御案置 御座前二員

舉講案置殿門內西邊東向設坐位鴻臚寺官贊進講

講官大學士一員出班行叩頭禮 上命賜講官坐講

官并鴻臚寺官承 旨贊叩頭訖展書官詣 御案前

跪展講章退講官坐講畢展書官詣 御案前跪掩講

章講官叩頭訖復班又大學士一員出班叩頭承 旨

坐講展書官一員展書俱如前儀序班二員舉 御案

二員舉講案退至原所鴻臚寺卿奏禮畢有 旨賜宴

衆官承 旨訖退至幽風亭前迎候 上乘板輿至亭

內降輿陞 御座 賜宴 儀具宴享

東宮出閣講學儀

太祖命學士宋濂授 皇太子 諸王經書大本堂後於
文華後殿及 肅皇改為便殿遂移於殿之東廂房
天順二年定 是日早侍衛侍儀如常儀執事等官
於 文華後殿行四拜禮畢鴻臚寺官請 皇太子陞
文華殿執事官導引至殿陞座師保等官於 丹陛
上行四拜禮畢各官退出內侍官導 皇太子至後殿
陞座以書案進每日侍班侍讀講官入分班東西立內
侍展書侍讀講官以次進講叩頭而退

每日講讀儀

每日早朝退後 皇太子出閣陞座內侍以書案進不
用侍衛侍儀執事等官惟侍班侍讀講官入行叩頭禮
畢分班東西向立內侍展書先讀四書則東班侍讀官
向前伴讀十數遍退復原班次讀經書或讀史書則西
班侍讀官向前伴讀亦如之務要字音正當句讀分明
讀畢各官退 一每日巳時侍讀侍講及侍書官俟
皇太子陞座畢入東西向立侍班內侍展書先講早所
讀四書則東班侍講官進講一遍退復原班次講早所
讀經史書則西班侍講官進講亦然務要直言解說明

白易曉講畢內侍收書訖侍書官向前侍習寫字務要開說筆法點畫端楷寫畢各官叩頭而退 午膳後是時

已回宮 從容遊息或習騎射 一每日晚讀本日所授書

各數遍至熟而止 一凡讀書三日一溫須背誦成熟

過溫書日免授新書講官通講須晚大義 一凡寫字

春夏秋月每日寫一百字冬月每日寫五十字 一凡

遇朔望節假及大風雨雪隆冬盛暑暫停講讀寫字

孝宗弘治十一年增定 是日早內侍設書案於 文華

殿內東禮部鴻臚寺執事官於後殿行四拜禮畢鴻臚

寺官請 皇太子陞 文華殿導引至殿陞座三師三

少并官僚以次序于 丹陛上行四拜禮畢從殿左右

門入分班東西立通事舍人以書案進內侍展書侍讀

官進讀讀畢侍講官進講講畢通事舍人徹案各官叩

頭退

穆宗隆慶六年增定 是日早侍衛侍儀如常儀內侍先

設 皇太子座於 文華殿之廂房正中向西向設書案

於座之左禮部鴻臚寺執事官候 皇太子出閣導引

至東廂房陞座提調輔臣并侍班講讀等官以次序立

丹墀行四拜禮畢各官以次入東廂房分班相向立鴻臚寺官贊起案通事舍人以講案進內侍展書侍讀官進讀讀畢侍講官進講講畢通事舍人徹案命賜酒飯各官叩頭而退其儀與天順年所定同但每日各官先詣文華門外東西向序立候皇上御日講經筵畢又題准東宮初講之時閣臣連侍五日以後仍于每月三八日一至先行叩頭而出然後各官進入供事

進春儀

今上萬曆八年定先一日鴻臚寺執事官設春案一張於皇極殿外東王門簷下是日文武百官各具朝服侍班執事官先詣中極殿行禮如常儀鴻臚寺堂上官跪奏請陞殿導駕官前導教坊司樂作上御皇極殿陞座樂止錦衣衛傳鳴鞭引入序班引順天府等官先就拜位鳴贊贊鞠躬樂作四拜興平身樂止內贊立於東王門外贊進春引入序班引順天府府尹至東王門外鴻臚寺堂上官招呼起案樂作擡案序班舉春案至正門外簷下置定樂止引入序班引府尹至案前

立內贊隨至簷下立贊跪鴻臚寺堂上官傳跪外贊亦
贊跪內贊贊進春府尹奏臣某等謹進某年春又奏
皇太后陛下春 中宮陛下春 某王殿下春俱在
午門外伺候請 命司禮監官捧進請 旨承 旨畢
內贊贊俯伏鴻臚寺堂上官傳俯伏外贊亦贊俯伏樂
作興平身樂止引入序班將府尹引下鴻臚寺堂上官
招呼起案擡案序班舉春案至原處置定府尹仍入原
班立外贊贊鞠躬樂作四拜興平身樂止順天府等官
退下侍立對贊贊排班班齊文武百官入班立定鳴贊
贊跪鴻臚寺堂上官一員於 丹陛中道跪致詞云新
春吉辰禮當慶賀致畢起身由東邊門入殿內侍立鳴
贊贊俯伏樂作興五拜叩頭興平身樂止鴻臚寺堂上
官殿內跪奏禮畢傳贊禮畢鳴鞭 駕興百官退

進書儀 上 世宗實錄

今上萬歷五年續定 前一日設表案於 皇極殿丹陛
之東設實錄案於丹墀中教坊司設中和韶樂及大樂
如常儀設 寶輿香亭表亭於史館前是日早錦衣衛
設 鹵簿駕 上御中極殿具充冕服文武百官具朝

服侍班監修總裁纂修等官具朝服至館前監修捧表
置表亭中纂修官捧寶錄置寶輿中鴻臚寺官導迎寶
錄寶輿香亭用鼓樂繖蓋由 會極門下階至橋南由
中道行表亭監修總裁等官後隨由二橋行至 皇極
門實錄寶輿香亭由中門入表亭監修總裁等官由左
門入至丹墀案前監修官捧表由東 王階陞置於表
案由東北邊下纂修官捧寶錄置於案樂作寶輿香亭
鼓樂繖蓋俱退監修總裁等官侍立于石墀東 內殿
鴻臚寺官奏執事官行禮贊五拜三叩頭訖奏請陞

殿導 駕官前導樂作 上御皇極殿樂止鳴鞭監修
總裁等官入班班列石墀上鴻臚寺官奏進寶錄樂作
序班舉寶錄案以次由中道陞至 殿門外 上興序
班舉寶錄案由中門入置于 殿中樂止班首由東北
邊階陞自東邊門入跪於案前贊總裁等官皆跪樂止
內侍官舉寶錄案入 內殿置於中 上復座樂止贊
俯伏班首及總裁等官皆俯伏樂作興平身樂止班首
復位贊鞠躬樂作贊四拜興平身樂止贊進表樂作序
班舉表案置于 殿中樂止贊宣表贊衆官皆跪鴻臚

寺官展表宣訖贊俯伏興樂作贊鞠躬四拜平身樂止
進實錄官退於石墀東侍立贊排班文武百官入班贊
班齊贊跪鴻臚寺官致詞云文武百官某官臣某等恭
惟 世宗肅皇帝神功聖德纂述成書光華萬世羣臣
懽忻禮當慶賀贊俯伏興贊鞠躬樂作贊四拜興平身
樂止贊有 制進實錄官仍入百官班贊跪宣 制云

世宗肅皇帝功德配天紀述詳實 朕心懽慶與卿
等同之宣訖贊俯伏樂作興平身樂止贊播笏鞠躬三
舞蹈跪山呼萬歲三贊出笏贊俯伏興樂作贊鞠躬四

拜興平身樂止禮畢次日司禮監官自 內殿送實錄
下 殿仍置寶輿中用繖蓋與監脩總裁副總裁官同
送至 皇史宬尊藏

